

編號 1 號

【野蓮鳥】李宜諭原作

熱天个美濃湖，湖面就像大大个鏡仔，日頭下發光个水波瞞啊瞞仔，鏡仔裡背有層層疊疊个岫崗、青柳柳个樹仔，還有闊闊个天、白白个雲……。這個時節，一陣野蓮鳥低低个飛過湖面。

熱天係野蓮鳥个繁殖時期，佢等會變啊特別靚哦！該鳥毛蓋打眼，全身有一跡一跡金黃色、咖啡色、白色同烏色个色神。厥腳長送長送¹、腳趾長長細細支，蓋好在浮啊水面个葉仔項行路，故所，在濫田大概都會看著佢等个身影。野蓮鳥个本名安到「水雉」，因為佢等行路个樣式蓋優雅，長長个尾還會搥啊搥仔，實在靚，故所，大家也會喊佢等「凌波仙子」。

在水陸交接个濫田會有蓋多野生个動物同植物。尤其有兜罕得看著个野生鳥仔、鴨仔、雁仔，佢等愛生養下一代，定著愛在濫田項，故所，又有人同濫田講係「鳥仔樂園」；佢還係地球个腰仔喲，有一等強个生態淨化功能！毋過，這下濫田都漸漸仔毋見核也，再來田坵个用藥忒傷重，故所，蓋多生態都破壞了了，盡多鳥仔、蟲仔、蛎仔都死淨淨，甚至絕種也，水雉也面臨共樣

个命運。

恁多年來，保育團體同美濃湖个野蓮農共下營造友善生態環境，飼來水雉在這做竇生養下一代，漸漸仔野蓮田就有咁多樣个自然生態，水雉也換名安到「野蓮鳥」，變做美濃湖个觀光特色之一。

本成野蓮農蓋惱水鳥仔，因為每擺種啊著个野蓮苗毋曾生根，水鳥仔就會來啄，啄死也就愛補種，加人盡無閒，野蓮農就會想辦法同佢等逐走。還過野蓮仔種下去 50 日邊仔，葉仔過撈實健壯也，水雉就會在葉仔頂項做竇，毋過，20 日過後野蓮仔就愛收成也，恁堵好又也係水雉愛生春孵子个時節，仰結煞正好？野蓮仔無去採收，就會忒老賣毋出去，毋過，係去採收，水雉就無法度孵子。

好得有農民願意退一步，野蓮鳥孵卵个地方就莫去採收，留分野蓮鳥孵子繁殖。就恁呢，營造也一個友善環境分野蓮鳥生活，這下美濃湖裡背个生態就緊來緊豐富也。

¹ 長送長送：音 cong^ˇ sung cong^ˇ sung；喻修長。

編號 1 號

【野蓮鳥】李宜諭原作

熱天个美濃湖，湖面就像大大个鏡仔，日頭下發光个水波瞞啊瞞欸，鏡仔裡背有層層疊疊个岫崗、青柳柳个樹仔、闊闊个天、白白个雲……。這個時節，一陣野蓮鳥低低个飛過湖面。

熱天係野蓮鳥个繁殖期，佢兜會變到特別靚哦！該鳥毛當打眼，全身有一跡一跡金黃色、咖啡色、白色同烏色个色目。厥腳長搜長搜¹，腳趾長長細細支，佢兜當好行在浮在水面个葉仔頂，故所，在濫泥地大概都會看著佢兜个身影。野蓮鳥个本名安到「水雉」，因為佢兜行路个樣仔優雅，長長个尾搥啊搥欸實在靚，故所，大家也會喊佢兜「凌波仙子」。

在水陸交接个濫泥地有當多野生个動物同植物。尤其有兜罕得看著个野生雞仔、鴨仔、雁仔，佢兜愛生養下一代抑係徙竇，都定著愛在濫泥地，故所，又有人同濫泥地喊做「鳥類樂園」；佢還係地球个腰仔唷，有一等強个生態淨化功能。毋過，這下濫泥地都漸漸仔毋見忒地，還過田坵个用藥忒傷重，故所，當多生態都分人破壞了了，盡多鳥仔、蟲仔、蛎仔都死淨淨，甚至絕

種，水雉也係面臨共樣个命運。

恁多年來，保育團體同美濃湖个野蓮農共下營造友善生態環境，錫來水雉在這做竇生養下一代，漸漸仔野蓮田就有咧多樣个自然生態，水雉也換名安到「野蓮鳥」，變做美濃湖个觀光特色之一。

其實，原旦野蓮農當惱水鳥仔，見擺正種啊著个野蓮苗還吉釘根²，水鳥仔就來啄，分佢啄死咧就愛補種，加盡無閒，野蓮農就會想辦法同佢兜逐走。再來就係野蓮仔種下去 50 日，葉仔較撈實壯旺地，水雉就會在葉頂做竇，毋過，20 日過後野蓮仔就愛收成地，恁堵好又也係水雉生卵孵子个時節，愛仰結煞正好？野蓮仔係無去採收，就會忒老賣毋出去，毋過，係去採收野蓮仔，水雉孵子就會失敗。

好得有農民願意退一步，野蓮鳥孵卵个所在，野蓮仔就莫採收，留分佢兜去孵卵出子。因為大家共同个合作，營造咧一個友善環境分野蓮鳥做得永久在這生活，這下美濃湖裡背个生態緊來緊豐富哩！

¹ 長搜長搜：音 cong^ˇ sung cong^ˇ sung；喻修長。

² 釘根：音 dang gin^ˊ；生根扎穩。